

**MUUNGANO WA  
TANGANYIKA NA ZANZIBAR -  
HISTORIA KATIKA PICHA**




**1964 – 2014**





**MUUNGANO WA  
TANGANYIKA NA ZANZIBAR -  
HISTORIA KATIKA PICHA  
1964-2014**



# Wimbo wa Taifa

Mungu ibariki Afrika  
Wabariki viongozi wake  
Hekima, Umoja na Amani  
Hizi ni ngao zetu  
Afrika na watu wake

**KIITIKIO:**

Ibariki Afrika  
Ibariki Afrika  
Tubariki watoto wa Afrika

Mungu ibariki Tanzania  
Dumisha Uhuru na Umoja  
Wake kwa Waume na Watoto  
Mungu ibariki Tanzania na watu wake

**KIITIKIO:**

Ibariki Tanzania  
Ibariki Tanzania  
Tubariki watoto wa Tanzania

# Yaliyomo

- ii. **Vifupisho**
  - iii. **Kauli ya Makamu wa Rais wa Jamhuri ya Muungano wa Tanzania**
  - iv. **Kauli ya Waziri wa Nchi, Ofisi ya Makamu wa Rais – Muungano**
  - v. **Dibaji**
1. **Sura ya Kwanza:** Hoihoi nderemo na vifijo mara baada ya Muungano.
  2. **Sura ya Pili:** Awamu ya Kwanza ya Serikali ya Jamhuri ya Muungano wa Tanzania.
    - 2.1: Viongozi wa Awamu ya Kwanza ya Serikali ya Jamhuri ya Muungano wa Tanzania.
    - 2.2: Picha za matukio mbalimbali ya Muungano 1964/1985
  3. **Sura ya Tatu:** Awamu ya Pili ya Serikali ya Jamhuri ya Muungano wa Tanzania.
    - 3.1: Viongozi wa Awamu ya Pili ya Serikali ya Jamhuri ya Muungano wa Tanzania
    - 3.2: Picha za matukio mbalimbali ya Muungano 1985/1995
  4. **Sura ya Nne:** Awamu ya Tatu ya Serikali ya Jamhuri ya Muungano wa Tanzania.
    - 4.1: Viongozi wa Awamu ya Tatu ya Serikali ya Jamhuri ya Muungano wa Tanzania
    - 4.2: Picha za matukio mbalimbali ya Muungano 1995/2005
  5. **Sura ya Tano:** Awamu ya Nne ya Serikali ya Jamhuri ya Muungano wa Tanzania.
    - 5.1: Viongozi wa Awamu ya Nne ya Serikali ya Jamhuri ya Muungano wa Tanzania
    - 5.2: Picha za matukio mbalimbali ya Muungano 2005/2014.
    - 5.3: Baadhi ya Majengo ya Taasisi za Muungano.

# Vifupisho

ASP	Afro Shiraz Party
CCM	Chama Cha Mapinduzi
JICA	Japan International Cooperation Agency
JKT	Jeshi la Kujenga Taifa
NCCR	National Convention for Construction and Reform
OAU	Organization of African Union
SMT	Serikali ya Jamhuri ya Muungano wa Tanzania
SMZ	Serikali ya Mapinduzi ya Zanzibar
TANU	Tanganyika African National Union
UDP	United Democratic Party

# Kauli ya Makamu wa Rais wa Jamhuri ya Muungano wa Tanzania



**Dkt. Mohamed Gharib Bilal**  
Makamu wa Rais wa Jamhuri  
ya Muungano wa Tanzania

Jamhuri ya Muungano wa Tanzania ni matokeo ya uhusiano wa kihistoria baina ya nchi iliyokuwa Jamhuri ya watu wa Tanganyika na ile ya Jamhuri ya watu wa Zanzibar. Hata kabla ya kuja kwa wakoloni kumekuwepo uhusiano kati ya watu wa Tanganyika na Zanzibar kibiashara, kidamu, kitamaduni na kisiasa hususan mahusiano ya vyama vyao vya ukombozi vya Tanganyika African National Union (TANU) na Afro Shiraz Party (ASP). Tukio la utiaji sahihi wa Hati za Muungano la tarehe 22 Aprili, 1964 lilikuwa ni ndoto ya Waasisi wa Muungano iliyotafsiriwa kwa vitendo kwa kuimarisha rasmi uhusiano huo kwa mujibu wa Mapatano ya Muungano. Mapatano hayo yalisainiwa na Baba wa Taifa, Mwalimu Julius Kambarage Nyerere na Sheikh Abeid Amani Karume, Rais wa kwanza wa Zanzibar na Mwenyekiti wa Baraza la Mapinduzi.

Muungano huu umeendelea kuimarika siku hadi siku kwa kusimamiwa na Viongozi wa Serikali ya Jamhuri ya Muungano wa Tanzania na Serikali ya Mapinduzi ya Zanzibar na kuungwa mkono na wananchi wengi. Serikali hizi zimeweka mfumo unaowezesha utekelezaji wa masuala ya Muungano kwa majadiliano na mashauriano baina ya Sekta zinazohusika. Mijadala ya kitaifa katika kushughulikia maeneo mbalimbali yanayoleta vikwazo katika utekelezaji, huwekwa wazi. Changamoto zake hukabiliwa kwa ufanisi mkubwa na viongozi wake huku wakiongozwa na dhamira njema na thabiti iliyojaa utashi wa kisiasa.

Mambo makuu mengi kwa ajili ya Taifa letu yamefanyika ambayo baadhi yake yamewekwa katika Kitabu hiki kwa ajili ya kuweka kumbukumbu ya historia ya Muungano katika Picha na elimu kwa Umma kwa kizazi hiki na vizazi vijavyo. Kupitia picha hizi, wananchi watapata fursa ya kufuatilia kwa karibu matukio mbalimbali yaliyotokea kutokana na jitihada za viongozi wetu katika awamu tofauti za uongozi wa Serikali zetu.

Kitabu hiki ni kumbukumbu nzuri ya urithi wetu adhimu kwa Taifa letu na kitasaidia wananchi wa pande zote za Muungano kupata elimu muafaka kuhusu Muungano wetu. Nawatajia ufuatiliaji mzuri wa picha zilizomo katika Kitabu hiki.

**UTANZANIA WETU NI MUUNGANO WETU: TUULINDE, TUUIMARISHE NA KUUDUMISHA**

# Kauli ya Waziri wa Nchi, Ofisi ya Makamu wa Rais– Muungano



**Mhe. Samia Suluhu  
Hassan (MB)**

Waziri wa Nchi, Ofisi ya  
Makamu wa Rais - Muungano

**K**utoa na kupokea habari kunatambuliwa duniani kote kuwa ni moja ya haki za msingi za binadamu, hivyo habari, maoni na ushauri mbalimbali juu ya masuala ya Muungano wetu hauna budi kutolewa na kupokelewa kwa lengo la kudumisha Muungano.

Ofisi ya Makamu wa Rais imechukua jitihada za makusudi kuelimisha jamii kuhusu masuala ya Muungano kwa madhumuni ya kuenzi na kuutetea. Wananchi wa pande zote za Muungano wamekuwa wakielimishwa kupitia Redio, Televisheni, Magazeti, Jarida la Muungano Wetu, Semina, Maonesho ya Kitaifa, Ziara na machapisho mbalimbali.

Ili kuendeleza juhudi hizo, Ofisi ya Makamu wa Rais, imeona ni vyema kuandaa kitabu cha picha zinazoonsha matukio yanayohusu Muungano wetu. Kitabu hiki kitasaidia wananchi wa Tanzania kupata historia ya Muungano katika picha. Historia katika picha imeanza wakati wa harakati za kuunganisha nchi zetu mbili mwaka 1964. Ni matarajio yangu kuwa picha hizi za kati ya mwaka 1964 hadi 2014, zitachangia katika kuinua uelewa wa historia ya Muungano wa Tanganyika na Zanzibar.

**JUKUMU LA KUDUMISHA MUUNGANO NI LETU SOTE.**



# Dibaji



**K**azi hii ni mchango wa mawazo yaliyotokana na viongozi, wana taaluma na wananchi wengi waliotaka kuona picha zenye kumbukumbu mbalimbali za matukio ya Muungano wetu zikihifadhiwa katika hali ya kuwezesha watu wengi kuziona kwa sasa na kwa kizazi kijacho. Tumejaribu kuchagua baadhi ya picha za matukio mbalimbali ya Muungano kuanzia Awamu ya Kwanza ya uongozi wa Serikali ya Jamhuri ya Muungano wa Tanzania hadi Awamu ya Nne.

Katika kuandaa kazi hii tumefanya majadiliano na wadau mbalimbali wakiwemo wasomi pamoja na waandishi wa Habari. Kati ya watu waliochangia na ambao tunatoa shukrani za pekee ni Mkuu wa Kitivo cha Sheria Chuo Kikuu

cha Dar es Salaam Profesa Palamagamba Kabudi. Profesa Kabudi alishiriki kwa kiasi kikubwa kutoa mawazo na mchango wake wa kuandaa kumbukumbu hizi. Tunamshukuru kwa njia ya pekee aliyekuwa Waziri wa Nchi, Ofisi ya Makamu wa Rais – Muungano, Mheshimiwa Muhammed Seif Khatib (Mbunge) kwa mchango wake aliotoa katika kufanikisha kazi hii. Alitumia muda wake mwingi kuchangia pamoja na kupitia baadhi ya picha na kutoa mawazo yake. Aidha, tunaishukuru Ofisi ya Makamu wa Pili wa Rais Zanzibar kwa ushirikiano. Vilevile tunatoa shukrani kwa magazeti ya Uhuru, Shirika la Magazeti ya Serikali Tanzania, Shirika la Utangazaji Tanzania, Shirika la Utangazaji Zanzibar, Idara ya Habari Maelezo, Ofisi ya Nyaraka na Kumbukumbu Zanzibar na Idara ya Habari Maelezo Zanzibar kwa ushirikiano waliotoa katika kukusanya picha za matukio mbalimbali ya Muungano na maelezo yake (captions).

Mwisho, tunawashukuru wananchi mbalimbali waliotoa mchango wao wa mawazo, katika maonesho mbalimbali ambayo Ofisi ya Makamu wa Rais – Muungano ilishiriki katika kutoa elimu ya Muungano kwa umma. Maoni na mawazo yao ndio matokeo ya Kitabu cha Historia ya Muungano katika Picha, 1964 - 2014. Tuna imani kuwa watazifurahia kumbukumbu hizi kwa kuzihifadhi na kuzithamini na kuendeleza moyo wa kudumisha Muungano wetu.

Sazi B. Salula  
**Katibu Mkuu,**  
**Ofisi ya Makamu wa Rais**  
 Aprili, 2014



## SURA YA KWANZA

Hoi hoi, nderemo na vifijo mwaka 1964 baada ya kuungana kwa Tanganyika na Zanzibar na kuunda Jamhuri ya Muungano wa Tanzania



Mwalimu Julius Kambarage Nyerere na Sheikh Abeid Amani Karume wakisaini Hati za Makubaliano ya Muungano, Tarehe 22 Aprili, 1964 Zanzibar. Wanaoshuhudia kwa karibu tukio hilo kushoto ni Oscar Kambona, Waziri wa mambo ya nje wa Tanganyika na Abdallah Kassim Hanga, Makamu wa Rais Zanzibar.



Mwalimu Julius K. Nyerere akichanganya udongo wa Tanganyika na Zanzibar huku akishuhudiwa na Rais Abeid Amani Karume na Mhe. Rashidi Mfaume Kawawa Makamu wa pili wa Rais na Waziri Mkuu wa Jamhuri ya Muungano wa Tanzania wakati wa sherehe za Muungano tarehe 26 Aprili, 1964. Walioshika chungu ni Bw. Hassan Omari Mzee (kulia) na Bw. Hasanaeli Mrema (kushoto).



Mwalimu Julius Kambarage Nyerere (kushoto) na Sheikh Abeid Amani Karume wakibadilishana Hati za Muungano wa Tanganyika na Zanzibar tarehe 27 Aprili, 1964.



Mwl. Julius K. Nyerere akimkaribisha Sheikh Abeid Amani Karume katika uwanja wa ndege wa Dar es Salaam alipokuja kuhudhuria sherehe za Muungano tarehe 26 Aprili, 1964.




Mwalimu Julius K. Nyerere na Sheikh Abeid Amani Karume wakipungia wananchi wakati wa sherehe za Muungano zilizofanyika Dar es Salaam tarehe 26 Aprili, 1964.



Waziri Mkuu na Makamu wa Pili wa Rais wa Jamhuri ya Muungano wa Tanzania Mhe. Rashid Mfaume Kawawa akionesha Bendera ya Taifa mara baada ya Muungano mwaka 1964.



Picha ya pamoja ya viongozi mbalimbali wakati wa maadhimisho ya siku ya Muungano tarehe 26 Aprili, 1964. Waliosimama mstari wa mbele wa tatu kutoka kushoto ni Kassim Hanga, Mwalimu Julius K. Nyerere, Sheikh Abeid Amani Karume, Rashid M. Kawawa na Sheikh Thabit Kombo.



Sheikh Abeid Amani Karume akiwa na baadhi ya viongozi katika picha ya pamoja Zanzibar mwaka 1964. Kutoka kushoto ni Kassim Hanga, Mzee Rashidi Kawawa na wa kwanza kulia ni Abdurahaman Babu.



Mwalimu Julius K. Nyerere na Sheikh Abeid Amani Karume wakiwa katika picha ya pamoja na viongozi mbalimbali wa Muungano wa Tanganyika na Zanzibar Ikulu mjini Zanzibar mwaka 1964.



## **SURA YA PILI**

Awamu ya kwanza ya Serikali  
ya Jamhuri ya Muungano wa  
Tanzania mwaka 1964 hadi  
1985

**AWAMU YA KWANZA YA UONGOZI 1964 -1984**

Awamu hii ilikuwa chini ya Rais wa kwanza wa Jamhuri ya Muungano wa Tanzania Mwalimu Julius Kambarage Nyerere, Makamu wa kwanza wa Rais alikuwa Sheikh Abeid Amani Karume na Makamu wa Pili wa Rais alikuwa Rashid Mfaume Kawawa. Aidha, aliyekuwa Makamu wa kwanza wa Rais alikuwa pia Rais wa Zanzibar na Mwenyekiti wa Baraza la Mapinduzi na Makamu wa pili wa Rais alikuwa pia Waziri Mkuu wa Serikali ya Jamhuri ya Muungano wa Tanzania. Utaratibu huu uliendelea kwa takribani miaka ishirini na moja. Wakati Rais wa Jamhuri ya Muungano wa Tanzania alipotoka upande wa Zanzibar, Waziri Mkuu wa Jamhuri ya Muungano ndiye aliyekuwa Makamu wa kwanza na Rais wa Zanzibar na Mwenyekiti wa Baraza la Mapinduzi alikuwa Makamu wa Pili wa Rais.

Mwaka 1967 iliundwa Jumuiya ya Afrika Mashariki na Tanzania ikawa mwanachama, mwaka 1977 iliyokuwa Jumuiya ya Afrika Mashariki ilivunjika na kufanya masuala yaliyokuwa yanasimamiwa na Jumuiya ya Afrika Mashariki kuongezwa kwenye orodha ya mambo ya Muungano ambayo ni Baraza la Taifa la Mitihani la Tanzania na mambo yanayohusika na kazi za Baraza hilo, Usafiri na Usafirishaji wa Anga, Utafiti, Utabiri wa Hali ya Hewa na Takwimu.

Muungano uliendelea kuimarika ambapo TANU na ASP viliungana na kuunda Chama Cha Mapinduzi (CCM) tarehe 5 Februari, 1977.

Mwaka 1972 Sheikh Abeid Amani Karume aliuawa na wapinga Mapinduzi. Kutokana na kifo hicho, Mheshimiwa Aboud Jumbe alichaguliwa kuchukua nafasi ya Makamu wa Kwanza wa Rais wa Jamhuri ya Muungano wa Tanzania na Rais wa Zanzibar na Mwenyekiti wa Baraza la Mapinduzi. Alitumikia nafasi hiyo kuanzia mwaka 1972 - 1984.


Katika kipindi hiki kulishuhudiwa vita dhidi ya Iddi Amini wa Uganda mwaka 1978 - 1979.

Mhe. Edward Moringe Sokoine alikuwa Waziri wa Jamhuri ya Muungano wa Tanzania kuanzia mwaka 1977 -1980 na 1983 – 1984 alipofariki dunia. Mhe. Cleopa David Msuya alikuwa Waziri Mkuu na Makamu wa pili wa Rais wa Jamhuri ya Muungano wa Tanzania kuanzia mwaka 1980 -1983. Mhe. Dkt. Salim Ahmed Salim alikuwa Waziri Mkuu wa Jamhuri ya Muungano wa Tanzania kuanzia mwaka 1984 – 1985.


Kutokana na hali ya kisiasa ya Zanzibar mwaka 1984, aliyekuwa Rais wa Zanzibar na Mwenyekiti wa Baraza la Mapinduzi, Sheikh Aboud Jumbe alijiuzulu na Ndugu Ali Hassan Mwinyi aliteuliwa kushika wadhifa huo 1984 -1985. Mwaka 1985 Rais wa Jamhuri ya Muungano wa Tanzania Mwalimu Julius K. Nyerere aling'atuka na badala yake Sheikh Ali Hassan Mwinyi alichaguliwa kuwa Rais wa Jamhuri ya Muungano wa Tanzania.

Katiba ya kudumu ya Jamhuri ya Muungano wa Tanzania ya mwaka 1977 ilitungwa kubadili ile ya muda ya mwaka 1965 na mwaka 1984 Zanzibar ilitunga Katiba yake.

## 2.1 Viongozi wa Awamu ya Kwanza ya Serikali ya Jamhuri ya Muungano wa Tanzania kuanzia mwaka 1964 hadi 1984



Mwl. Julius K. Nyerere  
Rais wa Jamhuri  
ya Muungano wa Tanzania  
1964-1985.



Sheikh Abeid Amani Karume  
Makamu wa Kwanza wa Rais wa Jamhuri  
ya Muungano wa Tanzania na Rais wa  
Zanzibar na Mwenyekiti wa  
Baraza la Mapinduzi  
1964 - 1972.




Ndg. Rashid Mfaume Kawawa  
Makamu wa Pili wa Rais wa Jamhuri ya  
Muungano wa Tanzania na Waziri Mkuu  
1964 - 1977.



Sheikh Aboud Jumbe Mwinyi  
Makamu wa Kwanza wa Rais wa Jamhuri ya  
Muungano wa Tanzania na Rais wa Zanzibar  
na Mwenyekiti wa Baraza la Mapinduzi  
1972 - 1984.




Ndg. Edward Moringe Sokoine  
Waziri Mkuu wa Jamhuri ya Muungano  
wa Tanzania 1977– 1980 na kuanzia  
1983 – 1984.



Ndg. Ali Hassan Mwinyi  
Makamu wa Kwanza wa Rais wa Jamhuri  
ya Muungano wa Tanzania na Rais wa  
Zanzibar na Mwenyekiti wa Baraza la  
Mapinduzi  
1984 - 1985.



Mheshimiwa Cleopa David Msuya  
Waziri Mkuu na Makamu wa pili wa Rais  
wa Jamhuri ya Muungano wa Tanzania  
1980 – 1983.



Mheshimiwa Dkt. Salim Ahmed Salim  
Waziri Mkuu wa Jamhuri ya Muungano  
wa Tanzania  
1984- 1985.

## 2.2 Matukio mbalimbali ya Muungano katika picha kuanzia mwaka 1964 hadi 1985



Mwalimu Julius K. Nyerere akiapishwa kuwa Rais wa Jamhuri ya Muungano wa Tanzania mwaka 1964 akishuhudiwa na Sheikh Abeid Amani Karume na mama Maria Nyerere.




Mwl. Julius K. Nyerere, Rais wa Kwanza wa Jamhuri ya Muungano wa Tanzania akiwa na Rais wa kwanza wa Zanzibar Sheikh Abeid Amani Karume wakati wa sherehe za Muungano zilizofanyika Zanzibar, 1964. Walio nyuma ni Kassim Hanga (mwenye miwani) Makamu wa Rais wa Serikali ya Mapinduzi ya Zanzibar na Sheikh Thabit Kombo Jecha, Katibu Mkuu wa Afro Shiraz Party (ASP).



Rais wa Jamhuri ya Muungano wa Tanzania, Mwalimu Julius K. Nyerere akiwa pamoja na Makamu wa Kwanza wa Rais wa Jamhuri ya Muungano wa Tanzania na Rais wa Zanzibar na Mwenyekiti wa Baraza la Mapinduzi Sheikh Abeid Amani Karume na Sheikh Thabit Kombo mwaka 1965.



Mwalimu Julius K. Nyerere, Sheikh Abeid A. Karume, Kassim Hanga na Said Iddi Bavuai katika sherehe za Mapinduzi. Nyuma ya Sheikh Abeid Amani Karume ni Bw. Edington Kisasi, Kamishna wa kwanza wa Polisi Zanzibar.



Mwalimu Julius K. Nyerere (wa pili kulia) akiwa pamoja na Sheikh Abeid A. Karume na Mhe. Rashid Mfaume Kawawa, Makamu wa Pili wa Rais wa Jamhuri ya Muungano wa Tanzania na Waziri Mkuu.



Rais Julius K. Nyerere (katikati), Makamu wa Kwanza wa Rais wa Jamhuri ya Muungano na Rais wa Zanzibar Mhe. Abeid Amani Karume wakikagua gwaride wakati wa maadhimisho ya sherehe za Muungano zilizofanyika Zanzibar mwaka 1966.



Mwalimu Julius K. Nyerere akiongea na viongozi mbalimbali mwaka 1966.



Rais wa Jamhuri ya Muungano wa Tanzania, Mwalimu Julius K. Nyerere akifuatana na Sheikh Abeid Amani Karume wakati wa ufunguzi wa Kituo cha kulea Watoto, Forodhani Zanzibar mnamo mwaka 1966.





Rais wa Jamhuri ya Muungano wa Tanzania, Mwalimu Julius K. Nyerere akifungua Kituo cha Watoto Yatima Forodhani Zanzibar mwaka 1966. Nyuma ya Mwalimu ni Sheikh Abeid Amani Karume na kushoto ni Bw. Salim Rashid Katibu wa kwanza wa Baraza la Mapinduzi Zanzibar.



Rais wa Jamhuri ya Muungano wa Tanzania, Mwalimu Julius K. Nyerere akifungua Kituo cha kulea Wazee cha Sebuleni, Zanzibar mnamo mwaka 1966. Kushoto ni Mama Fatma Karume na kulia ni Yussuf Himid, Brigedi Kamanda wa Nyuki, Zanzibar.



Mwalimu Julius K. Nyerere akiondoka katika uwanja wa ndege wa Zanzibar. Wanaoonekana kulia ni Yussuf Himid na nyuma ni Sheikh Abeid Amani Karume na Mama Fatma Karume.



Rais wa Jamhuri ya Muungano wa Tanzania, Mwalimu Julius K. Nyerere na Rais wa Zanzibar Sheikh Abeid Amani Karume wakiwa katika Uwanja wa Ndege wa Zanzibar.




Mwl. Julius K. Nyerere akiwa pamoja na mgeni wake Rais wa Misri Mhe. Gamal Abel Nasser alipoitembelea Tanzania mwaka 1966. Wa pili kushoto ni Makamu wa Kwanza wa Rais wa Jamhuri ya Muungano wa Tanzania na Rais wa Zanzibar Mhe. Abeid Amani Karume.



Mwl. Julius K. Nyerere akiwa pamoja na mgeni wake Rais wa Misri Mheshimiwa Gamal Abel Nasser alipoitembelea Tanzania mwaka 1966. Wa kwanza kulia ni Makamu wa Kwanza wa Rais wa Jamhuri ya Muungano wa Tanzania na Rais wa Zanzibar Mhe. Abeid Amani Karume.




Mwl. Julius Nyerere akimtunuku medali Rais wa kwanza wa Zanzibar na Mwenyekiti wa Baraza la Mapinduzi Sheikh Abeid Amani Karume kwa utumishi uliotukuka kwa wananchi wa Zanzibar, huku mama Maria Nyerere na mama Fatma Karume wakishuhudia Februari 19, 1967.



Makamu wa Kwanza wa Rais Sheikh Abeid Amani Karume akimwonesha mazao ya mpunga Mwalimu Julius K. Nyerere, Rais wa Jamhuri ya Muungano wa Tanzania. alipotembelea Zanzibar, mwaka 1968.




Mwalimu Julius K. Nyerere na Sheikh Abeid Amani Karume wakipokea Gwaride la Heshima wakati wa mojawapo ya sherehe za Muungano wa Tanganyika na Zanzibar.



Rais wa Jamhuri ya Muungano wa Tanzania Mwalimu Julius Nyerere akiwa na Rais wa Zanzibar Abeid Karume wakifurahia burudani zilizokuwa zikitolewa katika maadhimisho ya miaka 5 ya Muungano katika uwanja wa Amaan visiwani Zanzibar mwaka 1969.



◀ Mwalimu Julius K. Nyerere (katikati) pamoja na Makamu wa Kwanza wa Rais Mhe. Aboud Jumbe baada ya kuapishwa mwaka 1972 na Makamu wa Pili wa Rais Mhe. Rashid M. Kawawa wakiwa Ikulu Dar-es-Salaam.



Mhe. Aboud Jumbe akizungumza katika moja ya sherehe za Muungano.



Rais wa Jamhuri ya Muungano wa Tanzania, Mwalimu Julius K. Nyerere akisalimiana na Meya wa Mji wa Zanzibar Mstaahiki Mtoro Rehani Kingo mara tu alipowasili katika uwanja wa ndege wa Zanzibar.



Rais wa Jamhuri ya Muungano wa Tanzania, Mwalimu Julius K. Nyerere (kulia), Mfalme wa Ethiopia Haile Selassie (katikati) na Sheikh Abeid Amani Karume wakiwa katika uwanja wa ndege wa Zanzibar.





Makamu wa Kwanza wa Rais wa Jamhuri ya Muungano wa Tanzania na Rais wa Zanzibar Sheikh Abeid Amani Karume akiwa na Rais Zhou-enlai wa China alipowasili katika Uwanja wa Ndege wa Zanzibar.



Wananchi wakishiriki katika sherehe za Muungano zilizofanyika Dar es Salaam mwaka 1974.



Mwl. Julius K. Nyerere akiwa katika picha ya pamoja na viongozi mbalimbali. Wa kwanza kulia ni Mzee Thabit Kombo Jecha, Maalim Seif Sharrif Hamad, Ndg. Ali Hassan Mwinyi. Kushoto kwake ni Mhe. Rashid Mfaume Kawawa, Bw. Salim Ahmed Salim na Sheikh Idrisa Abdulwakil.



Wananchi wa Zanzibar wakiandamana mitaani katika moja ya sherehe za Muungano.



Mwalimu Julius K. Nyerere akizungumza na Mhe. Abdurahaman Babu , Waziri wa Mambo ya Nje na Biashara wa Serikali ya Mapinduzi ya Zanzibar, wakiwa mjini Zanzibar.




Mwalimu Julius K. Nyerere akiwa na Mzee Thabiti Kombo Jecha wakifurahia jambo.



Mwalimu Julius K. Nyerere akikagua timu ya mpira wa miguu katika uwanja wa Amaan Zanzibar mwaka 1975.




Makamu wa kwanza wa Rais wa Jamhuri ya Muungano wa Tanzania na Rais wa Zanzibar Sheikh Aboud Jumbe akipata maelezo mara baada ya kufungua kituo cha kupokelea umeme unaotoka Kidatu kilichopo Zanzibar, sherehe zilizofanyika mwaka 1976.



Mwalimu Julius K. Nyerere akisalimiana na viongozi wa Serikali. Anayempa mkono ni Ndg. Ali Hassan Mwinyi.



Mwalimu Nyerere akiwa na viongozi wa Serikali wakifurahia sherehe za Muungano. Kutoka kushoto ni Salim Rashid na kulia ni Oscar Kambona.



Mwalimu Julius K. Nyerere akipeana mkono na Rashid Mfaume Kawawa, kulia yupo Mhe. Ali Hassan Mwinyi, nyuma yao amesimama Mhe. Jaji Joseph Sindé Warioba na Maalim Seif Sharrif Hamad.



Mwalimu Julius K. Nyerere akihudhuria moja ya hafla ya kitaifa iliyoandaliwa kwa ajili ya sherehe za Muungano.




Mwalimu Julius K. Nyerere akiwa na muasisi wa ASP Sheikh Thabiti Kombo wakiangalia kamba ya usumba aliyokabidhiwa na watu wa Makunduchi.





Mwalimu Julius K. Nyerere wa pili (kulia) akiwa na Rais wa Zanzibar Mhe. Aboud Jumbe wa pili (kushoto), Katibu Mkuu wa CCM Bw. Pius Msekwa (kulia) na Naibu Katibu Mkuu wa CCM Zanzibar Bw. Ayoub Simba mwaka 1977 katika moja ya vikao vya serikali.



Rais wa Zanzibar Mhe. Aboud Jumbe akizungumza na Mwalimu Julius K. Nyerere mjini Zanzibar Februari, 1977.



Rais wa Jamhuri ya Muungano wa Tanzania Mwl. Julius K. Nyerere (wa pili kushoto) akiwa pamoja na viongozi mbalimbali. Kushoto ni Makamu wa Kwanza wa Rais wa Jamhuri ya Muungano na Rais wa Zanzibar Mhe. Aboud Jumbe na kulia ni Waziri Mkuu wa Jamhuri ya Muungano Mhe. Edward Moringe Sokoine.



Ujumbe wa viongozi wa Jamhuri ya Muungano wa Tanzania wakiwa katika mojawapo ya vikao vya kimataifa. Ujumbe huo uliongozwa na Rais wa Jamhuri ya Muungano wa Tanzania Mwalimu Julius K. Nyerere, Mhe. Salim Ahmed Salim na Mhe. Benjamin Mkapa.




Viongozi mbalimbali wakihudhuria mafunzo katika Jeshi la Kujenga Taifa. Picha inamwonyesha Mhe. Rashid M. Kawawa (wa kwanza mstari wa mbele) na wa pili mstari huo ni Mhe. Aboud Jumbe Mwinyi wakiwa katika kambi ya vijana ya Jeshi la Kujenga Taifa - Ruvu.




Mhe. Rashid M. Kawawa (katikati), Mhe. Aboud Jumbe (kushoto) pamoja na Mhe. Adamu Sapi Mkwawa (kulia) wakiwa katika mafunzo ya wiki mbili ya kijeshi katika kambi ya J.K.T Ruvu.



Rais Keneth Kaunda na Mkewe wakizuru kaburi la Hayati Sheikh Abeid Amani Karume wakati wa ziara ya Rais huyo nchini Tanzania.



Mwalimu Julius K. Nyerere akipokea salamu za heshima kutoka vikosi vya majeshi ya ulinzi na usalama siku ya Muungano mwaka 1981.



Rais wa Jamhuri ya Muungano wa Tanzania, Mwl. Julius Nyerere akiwa katika dhifa ya chakula cha usiku aliyoandaliwa na Waziri Mkuu wa India, Indira Gandhi alipotembelea India mwaka 1982. Anayeonekana pembeni ya Rais Nyerere ni Salim Ahmed Salim



Rais Nyerere akikagua gwaride la majeshi ya ulinzi na usalama kwenye uwanja wa Taifa Dar es Salaam kuadhimisha miaka 19 ya Muungano wa Tanzania mwaka 1983.



Mwl. Julius K. Nyerere akimpongeza Dkt. Salim Ahmed Salim baada ya kumwapisha kuwa Waziri Mkuu wa Jamhuri ya Muungano wa Tanzania 1984.



Rais Nyerere akihutubia kwenye kilele cha sherehe ya Muungano huko Zanzibar 1984.



Wananchi wakisherehekea miaka 20 ya Muungano wa Tanganyika na Zanzibar Mjini Zanzibar mwaka 1984.



Mwl. Julius K. Nyerere akicheza bao na kaka yake Chifu Burito nyumbani kwake Butiama akitazamwa na Ndg. Ali Hassan Mwinyi, mke wake mama Maria Nyerere mwaka 1984.



Mwalimu Julius K. Nyerere akimpongeza Mzee Ali Hassan Mwinyi baada ya kuteuliwa kuwa mgombea wa urais wa Jamhuri ya Muungano wa Tanzania mwaka 1985.



Mwl. Julius Nyerere, mwenyekiti wa CCM akivalishwa skafu na kijana wa chipukizi mwaka 1985





Makamu wa Rais Mhe. Aboud Jumbe na Waziri Mkuu Mhe. Cleopa Msuya wakizungumza mara baada ya sherehe za kuadhimisha sikukuu ya Muungano katika uwanja wa Taifa Dar es Salaam.



Rais wa Afrika Kusini Nelson Mandela akisalimiana na Rais Nyerere na mkewe Maria Nyerere alivyotembelea Tanzania baada ya kutoka kifungoni mwaka 1990.



## SURA YA TATU

Awamu ya pili ya Serikali ya  
Jamhuri ya Muungano wa  
Tanzania kuanzia mwaka 1985  
hadi 1995

**AWAMU YA PILI YA UONGOZI 1985 -1995**

Awamu hii ilikuwa chini ya uongozi wa Ndugu Ali Hassan Mwinyi. Makamu wa wa Pili wa Rais wa Jamhuri ya Muungano wa Tanzania alikuwa Sheikh Idrisa Abdulwakil ambaye alikuwa ni Rais wa Zanzibar na Mwenyekiti wa Baraza la Mapinduzi 1985 – 1990.

Mhe. Jaji Joseph Sinde Warioba alikuwa Makamu wa Kwanza wa Rais wa Jamhuri ya Muungano wa Tanzania na Waziri Mkuu kuanzia 1985 – 1990.

Mhe. John Samwel Malecela alikuwa Waziri Mkuu na Makamu wa Kwanza wa Rais wa Jamhuri ya Muungano wa Tanzania kuanzia mwaka 1990 – 1994.


Mhe. Cleopa David Msuya alikuwa Waziri Mkuu wa Jamhuri ya Muungano wa Tanzania kuanzia mwaka 1994 -1995.

Mwaka 1992 Serikali zetu ziliona umuhimu wa kuruhusu mfumo wa vyama vingi vya Siasa nchini. Hivyo basi, mwaka 1994 nafasi ya Makamu wa Rais wa Jamhuri ya Muungano wa Tanzania ilifanyiwa mabadiliko kufuatia mfumo wa demokrasia ya vyama vingi.

Katiba ya Jamhuri ya Muungano wa Tanzania ya mwaka 1977, ilifanyiwa marekebisho kupitia Sheria Na. 34 ya mwaka 1994 ambapo iliweka utaratibu wa kumpata Makamu wa Rais. Makamu wa Rais alipatikana kwa kuchaguliwa katika uchaguzi uleule pamoja na Rais baada ya kupendekezwa na chama chake wakati uleule anapopendekezwa mgombea wa kiti cha Rais na walipigiwa kura kwa pamoja. Mgombea kiti cha Rais akichaguliwa basi na Makamu wa Rais atakuwa amechaguliwa.

Katika awamu hii Sheria mbalimbali zimetungwa ambazo ni :- Sheria ya Maadili ya Viongozi wa Umma, Sheria Na.13 ya mwaka 1995; Sheria ya Uhamiaji, Na. 6 ya mwaka 1995 ; Sheria ya Mamlaka ya Kodi, Na. 11 ya mwaka1995; Sheria ya Benki Kuu ya Tanzania, Na 1 ya mwaka1995; Sheria ya Sheria ya Uraia Na. 6 ya mwaka 1995; na Sheria ya Usalama wa Taifa Na. 15 ya mwaka 1995.

### 3.1: Viongozi wa awamu ya pili ya Serikali ya Jamhuri ya Muungano wa Tanzania mwaka 1985 hadi 1995 chini ya uongozi wa Rais Ali Hassan Mwinyi



Ndg: Ali Hassan Mwinyi  
Rais wa Jamhuri ya Muungano wa  
Tanzania  
1985 – 1995.



Sheikh Idris Abdulwakil  
Makamu wa Pili wa Rais wa Jamhuri ya  
Muungano wa Tanzania na  
Rais wa Zanzibar na Mwenyekiti wa  
Baraza la Mapinduzi  
1985 - 1990.




Dkt. Salmuni Amour  
Rais wa Zanzibar na Mwenyekiti wa Baraza  
la Mapinduzi  
1990-2000.



Mheshimiwa Jaji Joseph Sinde Warioba  
Waziri Mkuu na Makamu wa Kwanza  
wa Rais wa Jamhuri ya Muungano wa  
Tanzania  
1985 – 1990.



Mheshimiwa John Samwel Malecela  
Waziri Mkuu na Makamu wa Kwanza  
wa Rais wa Jamhuri ya Muungano wa  
Tanzania  
1990 – 1994.



Mheshimiwa Cleopa David Msuya  
Waziri Mkuu na Makamu wa pili wa  
Rais wa Jamhuri ya Muungano wa  
Tanzania  
1994 – 1995.

### 3.2: Picha za matukio mbalimbali ya Muungano kuanzia mwaka 1985 hadi 1995




Rais Ali Hassan Mwinyi akiapa kuwa Rais wa Jamhuri ya Muungano wa Tanzania, Dar es Salaam, mwaka 1985.



Rais Ali Hassan Mwinyi ambaye pia ni Amiri Jeshi Mkuu akipokea salamu za utii kutoka vikosi vya ulinzi na usalama wakati wa kilele cha sherehe za miaka 24 ya Muungano wa Tanganyika na Zanzibar kwenye uwanja wa Taifa mjini Dar es Salaam mwaka 1988.



Rais wa Jamhuri ya Muungano wa Tanzania Mheshimiwa Ali Hassan Mwinyi pamoja na Mkeke mama Siti Mwinyi wakisaidia kuchambua karafuu walipotembelea kijiji cha Ndagaa kilichopo Wilaya ya Kati Mkoa wa Kusini Unguja, Zanzibar mwaka 1988.



Rais wa Jamhuri ya Muungano wa Tanzania Ndg. Ali Hassan Mwinyi akiwahutubia wakazi wa Makunduchi kijiji cha Koba huko Zanzibar katika mwisho wa ziara yake ya kutembelea Mkoa wa Kusini Unguja mwaka 1989.






Kikundi cha utamaduni cha shule ya msingi Chikongola Mtwara kikiwaburudisha wananchi katika kusherekea kilele cha miaka 25 ya Muungano wa Tanganyika na Zanzibar zilizofanyika kimkoa katika uwanja wa Umoja mjini Mtwara mwaka 1989.



Rais wa India Ramaswamy Venkataraman akiwa na mkewe Janaki pamoja na Rais wa Jamhuri ya Muungano wa Tanzania Ndg. Ali Hassan Mwinyi na mkewe Mama Siti Mwinyi walipohudhuria dhifa ya kitaifa iliyoandaliwa na Rais Mwinyi Ikulu jijini Dar es Salaam, Tanzania mwaka 1989 mwisho kushoto ni Rais wa Zanzibar Idris Abdulwakil.



Rais wa Jamhuri ya Muungano wa Tanzania Ndg. Ali Hassan Mwinyi akifungua daraja la Hombolo Mkoani Dodoma mwaka 1989.



Rais wa Jamhuri ya Muungano wa Tanzania Ndg. Ali Hassan Mwinyi akiwa na Mkurugenzi Mtendaji wa Benki ya Dunia alipomtembelea Ikulu jijini Dar es salaam katikati ni Gavana wa Benki Kuu ya Tanzania Ndg. Gilman Rutihinda mwaka 1992.



Hivi ndivyo ilivyokuwa kwenye uwanja wa Taifa wakati wa sherehe za kuadhimisha miaka 28 ya Muungano wa Tanganyika na Zanzibar ambapo askari huyo wa kikosi cha Magereza alidondokwa na kofia yake wakati kikosi hicho kilipokuwa kikitoa heshima kwa mgeni rasmi mwaka 1992.



Sehemu ya Umati wa Wananchi waliohudhuria sherehe za kuadhimisha miaka 28 ya Muungano wa Tanganyika na Zanzibar kwenye Uwanja wa Taifa, Dar es Salaam mwaka 1992.



Baadhi ya wananchi waliohudhuria sherehe za miaka 28 ya Muungano wa Tanganyika na Zanzibar uwanja wa Taifa, Dar es Salaam mwaka 1992.



Askari wa kikosi cha Polisi wakitoa heshima kwa Rais Ali Hassan Mwinyi katika sherehe za kuadhimisha miaka 29 ya Muungano wa Tanganyika na Zanzibar zilizofanyika kwenye Uwanja wa Taifa, Dar es Salaam mwaka 1993.



Rais wa Jamhuri ya Muungano wa Tanzania Ndg. Ali Hassan Mwinyi akizungumza na Waziri Mkuu na Makamu wa Kwanza wa Rais John Malecela baada ya sherehe za kuadhimisha miaka 29 ya Muungano wa Tanganyika na Zanzibar zilizofanyika Uwanja wa Taifa mwaka 1993.



Rais wa Zanzibar Dkt. Salmin Amour Juma, Waziri kiongozi wa Zanzibar Dkt. Omar Ali Juma na Rais mstaafu wa Zanzibar Sheikh Idris Abdulwakil wakibadilishana mawazo baada ya sherehe za miaka 29 ya Muungano wa Tanganyika na Zanzibar kwenye Uwanja wa Taifa Dar es Salaam mwaka 1993.



Baadhi ya wakazi wa mjini Zanzibar wakiandamana kuingia katika uwanja wa Amani wakati wa kilele cha sherehe za kuadhimisha miaka 30 ya Muuungano wa Tanganyika na Zanzibar zilizofanyika kitaifa mjini Zanzibar mwaka 1994.



Baadhi ya wakazi wa mjini Zanzibar wakiandamana wakati wa kilele cha sherehe za kuadhimisha miaka 30 ya Muuungano wa Tanganyika na Zanzibar zilizofanyika kitaifa mjini Zanzibar mwaka 1994.




Mhe. Rais Ali Hassan Mwinyi akihutubia Taifa wakati wa kilele cha maadhimisho ya miaka 30 ya Muungano wa Tanzania kwenye uwanja wa Amaan Zanzibar mwaka 1994.



Mhe. Horace Kolimba, Katibu mkuu wa CCM akiagana na Mhe. Dkt. Omar Ali Juma, Waziri Kiongozi wa Serikali ya Mapinduzi ya Zanzibar baada ya sherehe za Muungano zilizofanyika mjini Zanzibar mwaka 1994. Anayewaangalia ni Mzee Rashidi Mfaume Kawawa.



Mke wa Rais wa Jamhuri ya Muungano wa Tanzania Mama Siti Mwinyi(kulia), Mama Fatma Karume mke wa Rais wa kwanza Zanzibar Hayati Abeid Karume(kushoto) na Mama Salma Salmin mke wa Rais wa Zanzibar Dkt. Salmin Amour wakiwa katika dhifa ya usiku iliyoandaliwa Ikulu Zanzibar wakati wa maadhimisho ya miaka 30 ya Muungano wa Tanganyika na Zanzibar mwaka 1994.



Waziri Kiongozi wa Serikali ya Mapinduzi ya Zanzibar Mhe: Dkt. Omar Ali Juma akipokea Mwenge wa Uhuru.





Amiri Jeshi Mkuu Rais Ali Hassan Mwinyi akipokea salamu za heshima kutoka kwa vikosi vya Jeshi la Ulinzi na Usalama wakati wa sherehe za kuadhimisha miaka 31 ya Muungano wa Tanganyika na Zanzibar zilizofanyika kwenye uwanja wa Taifa Dar es Salaam mwaka 1995.



Amiri Jeshi Mkuu Rais Ali Hassan Mwinyi akikagua gwaride la kikosi cha wanawake wa Jeshi la Ulinzi la Wananchi wa Tanzania katika uwanja wa Taifa, Dar es Salaam mwaka 1995.



Kikosi cha bendera kikitoa heshima kwa Amiri Jeshi Mkuu Rais Ali Hassan Mwinyi katika sherehe za kuadhimisha miaka 31 ya Muungano wa Tanganyika na Zanzibar zilizofanyika kwenye uwanja wa Taifa Dar es Salaam mwaka 1995.



Kikosi cha anga cha Jeshi la Wananchi wa Tanzania kikitoa heshima mbele ya Amiri Jeshi Mkuu Rais Ali Hassan Mwinyi kwa mwendo wa pole kwenye uwanja wa Taifa ,Dar es salaam mwaka 1995.



Kikosi cha anga cha Jeshi la Wananchi wa Tanzania kikipita mbele ya Amiri Jeshi Mkuu Rais Ali Hassan Mwinyi kwa mwendo wa pole wakati wa maadhimisho ya miaka 31 ya Muungano zilizofanyika kwenye uwanja wa Taifa Dar es Salaam mwaka 1995.



Amiri Jeshi Mkuu na Rais wa Jamhuri ya Muungano wa Tanzania Mhe. Ali Hassan Mwinyi akisalimiana na Rais Mstaafu wa Zanzibar Alhaj Aboud Jumbe baada ya sherehe za kuadhimisha miaka 31 ya Muungano wa Tanganyika na Zanzibar zilizofanyika kwenye uwanja wa Taifa Dar-es-salaam mwaka 1995.



## **SURA YA NNE**

Awamu ya Tatu ya Serikali  
ya Jamhuri ya Muungano wa  
Tanzania kuanzia mwaka  
1995 hadi 2005

**AWAMU YA TATU YA UONGOZI 1995 -2005**

Awamu hii ilikuwa chini ya uongozi wa Mheshimiwa Benjamin William Mkapa. Mhe. Dkt. Omar Ali Juma alikuwa Makamu wa Rais wa Jamhuri ya Muungano wa Tanzania kuanzia mwaka 1995 – 2001 alipoaga dunia. Kufuatia kifo cha Mhe. Dkt. Omar Ali Juma, Mhe. Dkt. Ali Mohamed Shein aliteuliwa kushika wadhifa wa Makamu wa Rais wa Jamhuri ya Muungano wa Tanzania kuanzia mwaka 2001 – 2005.

Mhe. Fredrick Tulway Sumaye alikuwa Waziri Mkuu wa Jamhuri ya Muungano wa Tanzania kuanzia mwaka 1995 – 2005.

Katika awamu hii kuna Sheria mbalimbali ambazo zimetungwa, baadhi ya sheria hizo ni:- Tume ya Pamoja ya Fedha Na 14 ya mwaka 1996; Sheria ya Biashara ya Bima ya Tanzania Na.18 ya mwaka 1996; na Sheria ya Usalama wa Taifa Na. 15 ya mwaka 1996.

Ofisi ya Makamu wa Rais iliundwa kwa mujibu wa Katiba ya Jamhuri ya Muungano wa Tanzania ya Mwaka 1977 Ibara ya 47, ikisomwa pamoja na Sheria Namba 34 ya Mwaka 1994, Kifungu cha 11. Ofisi hii ni miongoni mwa Ofisi kuu ambayo imekabidhiwa majukumu ya kitaifa ya kuratibu mambo yote ya Muungano na kusimamia ushirikiano katika mambo yasiyo ya Muungano kati ya Serikali ya Jamhuri ya Muungano wa Tanzania na Serikali ya Mapinduzi Zanzibar. Aidha, jukumu lingine ni kuratibu na kusimamia masuala ya hifadhi ya Mazingira.

**4.1 Awamu ya tatu ya viongozi wa Serikali ya Jamhuri ya Muungano wa Tanzania kuanzia mwaka 1995 hadi 2005 chini ya Rais Benjamin William Mkapa**



Mhe. Benjamin William Mkapa  
Rais wa Jamhuri ya Muungano wa  
Tanzania  
1995 – 2005.




Mhe. Dkt. Omar Ali Juma  
Makamu wa Rais wa Jamhuri ya  
Muungano wa Tanzania  
1995 – 2001.



Mhe. Dkt. Ali Mohamed Shein  
Makamu wa Rais wa Jamhuri ya  
Muungano wa Tanzania  
2001-2005.



Mhe. Fredrick Tulway Sumaye  
Waziri Mkuu wa Jamhuri ya Muungano  
wa Tanzania  
1995 – 2005.




Mhe. Benjamin Wiliam Mkapa akiapa kuwa Rais wa Jamhuri ya Muungano wa Tanzania mwaka 1995.



Rais wa Jamhuri ya Muungano wa Tanzania Mheshimiwa Benjamin William Mkapa akiwa pamoja na Waziri Mkuu Mheshimiwa Fredrick Sumaye wakati akitangaza Baraza la Mawaziri Ikulu jijini Dar es Salaam mwaka 1995.





Rais wa Jamhuri ya Muungano wa Tanzania Mhe. Benjamin William Mkapa akiongea na Rais wa Zanzibar Mhe. Dk. Salmin Amour katika sherehe za miaka 34 ya Muungano zilizofanyika katika uwanja wa Taifa jijini Dar es Salaam mwaka 1998.



Askari wa vikosi mbalimbali vya Jamhuri ya Muungano wa Tanzania wakitoa heshima wakati wa sherehe za miaka 35 ya Muungano mwaka 1999.

#### 4.2 Matukio ya Muungano katika picha kuanzia mwaka 1995 hadi 2005



Rais wa Jamhuri ya Muungano wa Tanzania na Amiri Jeshi Mkuu, Mhe. Benjamin Mkapa akiwasili uwanja wa Taifa mjini Dar es Salaam na Mkuu wa Jeshi la Wananchi Tanzania Jenerali Robert Mboma katika maadhimisho ya miaka 35 ya Muungano mwaka 1999.



Rais wa Jamhuri ya Muungano wa Tanzania Mhe. Benjamin Mkapa akiwa na Makamu wa Rais Dkt Omar Ali Juma na Waziri Mkuu Fredrick Sumaye baada ya kuwasili katika uwanja wa ndege mjini Dar es Salaam akitokea Uganda mwaka 2000.



Baadhi ya viongozi na wageni waalikwa waliohudhuria sherehe za miaka 36 ya Muungano kwenye uwanja wa Taifa Dar es Salaam. Katikati ni Rais wa Jamhuri ya Muungano wa Tanzania Mhe. Benjamin Mkapa, kushoto kwake ni Makamu wa Rais wa Jamhuri ya Muungano wa Tanzania Dkt. Omar Ali Juma, na kulia kwake ni Rais wa Zanzibar Dkt. Salmin Amour mwaka 2000.



Mhe. Rais Benjamin Mkapa akijiandaa kuondoka baada ya kuhitimishwa kwa gwaride rasmi kwenye uwanja wa Taifa mjini Dar es Salaam, katikati (mwenye miwani) ni Makamu wa Rais Mhe. Dkt. Omar Ali Juma na kulia ni Rais wa Zanzibar Mhe. Dkt. Salmin Amour mwaka 2000.



Vikosi vya majeshi ya ulinzi na usalama vikitoa heshima kwa Amiri Jeshi Mkuu wa Majeshi hayo Rais Benjamin Mkapa katika gwaride rasmi la kusherehekea miaka 37 ya Muungano mwaka 2001.



Waandamanaji wakipita mbele ya jukwaa kuu katika uwanja wa Taifa, Dar es Salaam kusherehekea miaka 38 ya Muungano mwaka 2002.



Amiri Jeshi Mkuu Mhe. Rais Benjamin Mkapa akipokea salamu za heshima wakati gwaride rasmi la vikosi vya ulinzi na usalama lilipokuwa linapita mbele yake ikiwa ni sehemu ya maadhimisho ya Muungano uwanja wa Taifa, Dar es Salaam.



Vijana wakipita mbele ya jukwaa kuu la uwanja wa Taifa, Dar es Salaam kwenye sherehe za miaka 38 ya Muungano mwaka 2002.



Spika wa Bunge la Jamhuri ya Muungano wa Tanzania Mhe. Pius Msekwa kushoto akizungumza na Katibu Mkuu Mstaafu wa uliokuwa Umoja wa Nchi za Afrika OAU Mhe. Dkt Salim Ahmed Salim na Rais Mstaafu wa Zanzibar Mhe. Dkt. Salmin Amour Juma wakati wa sherehe za miaka 38 ya Muungano mwaka 2002.




Rais wa Jamhuri ya Muungano wa Tanzania Mhe. Benjamin William Mkapa akikaribishwa na mwenyeji wake Waziri Mkuu wa India Atal Bihari Vajpayee, mjini New Delhi nchini India mwaka 2002



Mwenyekiti wa Chama cha NCCR Mageuzi Mhe. James Mbatia kushoto akizungumza na Mwenyekiti wa UDP Mhe. John Cheyo kwenye sherehe za Muungano uwanja wa Taifa.



Rais wa Jamhuri ya Muungano wa Tanzania Mheshimiwa Benjamin Mkapa akihutubia wakazi wa Jadida Wete - Pemba, Zanzibar mwaka 2002.



Rais wa Jamhuri ya Muungano wa Tanzania Mheshimiwa Benjamin Mkapa akikata utepe kuzindua rasmi kituo cha Afya huko Chani Zanzibar mwaka 2002.





Rais wa Jamhuri ya Muungano wa Tanzania Benjamin Mkapa akiwa na Rais wa China Hu Jintao baada ya mazungumzo ya kuimarisha mahusiano kati ya China na Tanzania yaliyofanyika Ikulu huko China Juni mwaka 2004.



Rais wa Marekani George W. Bush wakifurahia jambo na Rais wa Jamhuri ya Muungano wa Tanzania Mhe. Benjamin Mkapa pamoja na Waziri Mkuu wa Uingereza Tony Blair wakati wa mkutano ulioshirikisha viongozi wa Nchi mbalimbali huko Scotland Julai, 2005.



## **SURA YA TANO**

Awamu ya nne ya Serikali  
ya Jamhuri ya Muungano wa  
Tanzania kuanzia  
mwaka 2005 hadi 2014

**AWAMU YA NNE YA UONGOZI 2005 HADI SASA 2014**

Awamu hii inaongozwa na Mhe. Dkt. Jakaya Mrisho Kikwete. Mhe. Dkt. Ali Mohamed Shein alikuwa Makamu wa Rais wa Jamhuri ya Muungano wa Tanzania kuanzia mwaka 2005 – 2010 na kuanzia mwaka 2010 hadi sasa 2014 Mhe. Dkt. Ali Mohamed Shein alichaguliwa kuwa Rais wa Zanzibar na Mwenyekiti wa Baraza la Mapinduzi.

Mhe. Dkt Mohammed Gharib Bilal ni Makamu wa Rais wa Jamhuri ya Muungano wa Tanzania kuanzia mwaka 2010 hadi sasa 2014.

Mhe. Edward Lowassa alikuwa Waziri Mkuu wa Jamhuri ya Muungano wa Tanzania kuanzia mwaka 2005 – 2008. Mwezi Februari, 2008 Mhe. Edward Lowassa alijiuzulu wadhifa wake na Mhe. Mizengo Kayanza Pinda aliteuliwa kushika wadhifa wa Waziri Mkuu wa Jamhuri ya Muungano wa Tanzania yaani 2008 hadi sasa 2014.

Mwaka 2006 Kamati ya Pamoja ya Serikali ya Jamhuri ya Muungano wa Tanzania (SMT) na Serikali ya Mapinduzi ya Zanzibar (SMZ) iliundwa ili kushughulikia kero za Muungano na kuzipatia ufumbuzi chini ya uenyekiti wa Mhe. Makamu wa Rais wa Jamhuri ya Muungano wa Tanzania.

Mwaka 2014 tunashuhudia tukio kubwa la Muungano kutimiza miaka 50 ya Muungano wetu na yanafanyika sambamba na upatikanaji wa Katiba Mpya ya Jamhuri ya Muungano wa Tanzania ya mwaka 2014.

Taifa letu limekuwa na amani na utulivu kwani ni jambo lililo dhahiri kuwa Muungano wetu umekuwa ndio utambulisho wetu ndani na nje ya Tanzania.

**5.1 Viongozi wa awamu ya nne ya Serikali ya Jamhuri ya Muungano wa Tanzania chini ya Rais Jakaya Mrisho Kikwete kuanzia mwaka 2005 hadi sasa 2014**



Mhe. Dkt. Jakaya Mrisho Kikwete  
Rais wa Jamhuri ya Muungano wa  
Tanzania  
2005- hadi sasa 2014.



Mhe. Dkt. Ali Mohamed Shein  
Makamu wa Rais wa Jamhuri ya  
Muungano wa Tanzania  
2005- 2010.



Mhe. Dkt. Mohamed Gharib Bilal  
Makamu wa Rais wa Jamhuri ya  
Muungano wa Tanzania  
2010 - hadi sasa 2014.



Mhe. Dkt. Ali Mohamed Shein  
Rais wa Zanzibar na Mwenyekiti wa  
Baraza la Mapinduzi  
2010 - hadi sasa 2014.



Mhe. Dkt. Amani Abeid Karume  
Rais wa Zanzibar na Mwenyekiti wa  
Baraza la Mapinduzi  
2000 – 2010.



Mhe. Edward Lowassa  
Waziri Mkuu wa Jamhuri ya  
Muungano wa Tanzania  
2005– 2008.



Mhe. Mizengo Kayanza Peter Pinda  
Waziri Mkuu wa Jamhuri ya Muungano  
wa Tanzania  
2008 hadi sasa 2014.

## 5.2 Matukio ya Muungano katika picha kuanzia mwaka 2005 hadi 2014



Mhe. Jakaya Mrisho Kikwete akiapa kuwa Rais wa Jamhuri ya Muungano wa Tanzania kwa kipindi cha pili cha uongozi mbele ya Jaji Mkuu Augustino Ramadhani. katikati ni Katibu Mkuu Kiongozi Ndg. Philemon Luhanjo mwaka 2010.



Rais wa Jamhuri ya Muungano wa Tanzania, Mhe. Jakaya Mrisho Kikwete akiteta na Makamu wa Rais wa Jamhuri ya Muungano wa Tanzania, Mhe. Dkt. Ali Mohamed Shein.



Makamu wa Rais wa Jamhuri ya Muungano wa Tanzania, Mhe. Dkt. Ali Mohamed Shein akiwa katika mazungumzo na Rais wa Serikali ya Mapinduzi ya Zanzibar Mhe. Amani Abeid Karume alipomtembelea Ikulu Zanzibar.



Makamu wa Rais wa Jamhuri ya Muungano wa Tanzania, Mheshimiwa Dkt. Ali Mohamed Shein akisalimiana na Mama Maria Nyerere ambaye ni mke wa Baba wa Taifa Hayati Mwalimu Julius K. Nyerere.





Waziri wa Nchi Ofisi ya Makamu wa Rais-Muungano, Mhe. Hussein Mwinyi akihutubia katika kongamano la wanafunzi wa Vyuu Vikuu kutoka Tanzania Bara na Zanzibar, mwaka 2007.



Baadhi ya wanafunzi wa Vyuu Vikuu wakiwa katika picha ya pamoja na Waziri wa Nchi Ofisi ya Makamu wa Rais-Muungano, Mhe. Hussein Mwinyi (wa tatu kulia) mwaka 2007.



Makamu wa Rais wa Jamhuri ya Muungano wa Tanzania, Mheshimiwa Dkt. Ali Mohamed Shein akifungua jengo la Ofisi ya Makamu wa Rais lililopo katika mtaa wa Luthuli, Dar es Salaam, Aprili 2009. Anayefuatilia tukio hilo kwa karibu ni Waziri wa Nchi Ofisi ya Makamu wa Rais – Muungano Mheshimiwa Muhammed Seif Khatib.



Makamu wa Rais wa Jamhuri ya Muungano wa Tanzania, Mhe. Dkt. Ali Mohamed Shein akiwa katika picha ya pamoja na viongozi mbalimbali wa Serikali katika hafla ya kufungua jengo la Ofisi ya Makamu wa Rais lililopo katika mtaa wa Luthuli, Dar es Salaam mwaka 2009.



Makamu wa Rais wa Jamhuri ya Muungano wa Tanzania, Mhe. Dkt. Ali Mohamed Shein akiwa katika kikao cha Kamati ya Pamoja ya SMT na SMZ ya kushughulikia masuala ya Muungano kilichofanyika katika ukumbi wa Ofisi ya Makamu wa Rais tarehe 19 Mei, 2009. Wengine kulia ni Waziri Mkuu wa Jamhuri ya Muungano wa Tanzania Mhe. Mizengo Kayanza Peter Pinda na Waziri Kiongozi wa Serikali ya Mapinduzi ya Zanzibar, Mhe. Shamsi Vuai Nahodha na (kushoto).



Washiriki wa Semina ya Muungano wakiwa katika picha ya pamoja. Waliokaa mbele ni Waziri wa Nchi Ofisi ya Makamu wa Rais Mhe. Muhammed Seif Khatib (wa pili kulia), Profesa Issa Shivji, Katibu Mkuu, Afisi ya Rais, Katiba na Utawala Bora Bw. Mahadhi J. Maalim, Kaimu Mkurugenzi Idara ya Muungano Bw. Baraka R. Baraka (wa kwanza kulia) mwaka 2009.



Mhe. Dkt. Jakaya Mrisho Kikwete akipokea Heshima wakati Gwaride likipita mbele ya jukwaa kuu katika maadhimisho ya miaka 46 ya Muungano mwaka 2010. Wengine ni Mhe. Dkt. Ali Mohamed Shein, Makamu wa Rais wa Jamhuri ya Muungano wa Tanzania, Mhe. Dkt. Amani Abeid Karume, Rais wa Zanzibar na Mwenyekiti wa Baraza la Mapinduzi, Mhe. Mizengo Pinda Waziri mkuu wa Jamhuri ya Muungano wa Tanzania, Jenerali Davis Mwamunyange Mkuu wa Majeshi na mke wa Rais wa Zanzibar mama Shadya Karume.



Kikundi cha Ngoma ya Asili kutoka Pemba wakitumbuiza wakati wa maadhimisho ya Sherehe za miaka 46 ya Muungano zilizofanyika katika Uwanja wa Uhuru – Dar es Salaam mwaka 2010.



Vijana kutoka sehemu mbalimbali nchini wakiwa wamekaa kuonesha rangi za Bendera ya Taifa katika jukwaa la Uwanja wa Uhuru, Dar es Salaam wakati wa sherehe za maadhimisho ya miaka 46 ya Muungano mwaka 2010.



Kikundi cha Ngoma ya Asili kutoka Shinyanga wakitumbuiza wakati wa maadhimisho ya Sherehe za Muungano mwaka 2010 katika Uwanja wa Uhuru – Dar es Salaam.




Mhe. Dkt. Jakaya Mrisho Kikwete, Rais wa Jamhuri ya Muungano wa Tanzania akikagua Gwaride Maalum la Vikosi vya Ulinzi na Usalama wakati wa maadhimisho ya miaka 46 ya Muungano katika uwanja wa Taifa wa Uhuru, Dar es Salaam akiwa pamoja na Mkuu wa Majeshi Jenerali Davis Mwamunyange mwaka 2010.



Kikundi cha Sarakasi cha shule ya Msingi Hazina iliyopo Dar es Salaam kikitoa burudani wakati wa maadhimisho ya miaka 46 ya Muungano katika uwanja wa Uhuru Dar es Salaam mwaka 2010.



Waziri wa Nchi Ofisi ya Makamu wa Rais Mhe. Muhammed Seif Khatib akiteta na Makamu Mwenyekiti wa Tume ya Pamoja ya Fedha Ndg. Abdulrahman Mwinyijumbe walipokutana katika Ofisi za Tume, Zanzibar mwaka 2010.



Waziri wa Nchi Ofisi ya Makamu wa Rais Mhe. Muhammed Seif Khatib akipata maelezo toka kwa Meneja wa Shirika la Umeme Pemba wakati alipotembelea kituo cha kuzalisha umeme wa dizeli kilichopo Weshu mwaka 2010.



Rais wa Jamhuri ya Muungano Dkt. Jakaya Mrisho Kikwete na Mkuu wa Majeshi Jenerali Davis Mwamunyange wakiwasili wakati wa sherehe za miaka 47 ya Muungano zilizofanyika kwenye Uwanja wa Amaan Mjini Zanzibar mwaka 2011.



Vijana wa halaiki wakiwa kwenye maadhimisho ya miaka 47 ya Muungano wa Tanganyika na Zanzibar iliyofanyika katika uwanja wa Amaan Mjini Zanzibar mwaka 2011.





Waziri wa Nchi Ofisi ya Makamu wa Rais Muungano Samia Suluhu Hassan akionyeshwa Shati na Mtaalamu asiyeona Bw. Abdalla Nyangalo wakati alipotembelea Maonyesho ya Walemavu katika Maadhimisho ya Siku ya Kitaifa ya Fimbo nyeupe{wasioona} kulia Mkuu wa Mkoa wa Singida Bw. Paseko Kone mwaka 2011.



Makamu wa Rais wa Jamhuri ya Muungano wa Tanzania, Mhe. Dkt. Mohammed Gharib Bilal, Mama Asha Bilal, Mkuu wa Mkoa wa Mbeya, Abbas Kandoro na baadhi ya viongozi wa mkoa huo, wakitoka kukagua ujenzi wa mradi wa Bwawa la umwagiliaji lililopo kijiji cha Rwayo, katika ziara aliyofanya mkoani Mbeya Februari 25, 2012



Mhe. Dkt. Jakaya Kikwete, Rais wa Jamhuri ya Muungano wa Tanzania akisalimiana na Mama Maria Nyerere katika maadhimisho ya miaka 48 ya Muungano yaliyofanyika katika kiwanja cha Uhuru jijini Dar es Salaam mwaka 2012. Kulia ni Spika wa Bunge la Jamhuri ya Muungano wa Tanzania Anna Makinda.



Walioshika vibuyu na chungu wakati wa tukio la kuchanganya udongo wa Tanganyika na Zanzibar tarehe 24 Aprili, 1964 wakiwa katika viwanja vya Ikulu, Dar es Salaam wakati wa hafla fupi ya sherehe za miaka 48 ya Muungano mwaka 2012. Kutoka kushoto ni Bi. Khadija Abasi Rashid, Bw. Hasanieli Mrema, Bw. Hassan Omari Mzee na Bi. Sifael Shuma.



Viongozi wa Kitaifa wakiwa jukwaani wakiimba wimbo wa Taifa wakati wa sherehe za maadhimisho ya miaka 48 ya Muungano zilizofanyika kwenye uwanja wa Uhuru, Dar es Salaam 2012. Katikati ni Rais wa Jamhuri ya Muungano wa Tanzania, Mhe. Dkt. Jakaya Mrisho Kikwete, kushoto ni Rais wa Zanzibar, Mhe. Dkt. Ali Mohamed Shein, Makamu wa Rais Mhe. Dkt. Mohamed Bilal na Makamu wa kwanza wa Rais wa Zanzibar Mhe. Seif Sharrif Hamad, kushoto ni Waziri Mkuu Mizengo Pinda na mama Salma Kikweke.



Mhe. Dkt. Jakaya Kikwete na Rais wa Zanzibar na Mwenyekiti wa Baraza la Mapinduzi, Mhe. Dkt. Ali Mohamed Shein wakiwa katika picha ya pamoja na Wajumbe wa Tume ya Mabadiliko ya Katiba wakiongozwa na Mwenyekiti wake, Jaji Joseph Warioba mara baada ya kumalizika kwa hafla ya kukabidhi ripoti kuhusu Katiba Mpya iliyoandaliwa na Tume hiyo katika viwanja vya Karimjee Jijini Dar es Salaam mwaka 2013.



Rais wa Jamhuri ya Muungano wa Tanzania Mhe. Dkt. Jakaya Mrisho Kikwete akisalimiana na Makamu wa Rais wa Jamhuri ya Muungano wa Tanzania Mhe. Dkt. Mohamed Gharib Bilal wakati wa sherehe za maadhimisho ya miaka 49 ya Muungano yaliyofanyika katika uwanja wa Uhuru, Dar es Salaam mwaka 2013. Kutoka kulia ni Rais mstaafu Mhe. Benjamin William Mkapa na Makamu wa kwanza wa Rais wa Zanzibar Mhe. Seif Sharrif Hamad.




Mwenyekiti wa Kamati ya pamoja ya SMT na SMZ, Makamu wa Rais wa Serikali ya Jamhuri ya Muungano wa Tanzania Mhe. Dkt. Mohamed Gharib Bilal akiongoza kikao cha kujadili kero za Muungano kilichofanyika katika ukumbi wa New Dodoma Hotel Mjini Dodoma. Kushoto kwake ni Waziri Mkuu Mheshimiwa Mizengo Pinda na upande wa kulia ni Makamu wa Pili wa Rais wa Zanzibar Mhe. Balozi Seif Ali Iddi juni 2013.



Rais Barak Obama wa Marekani akiwa na mwenyeji wake Rais wa Jamhuri ya Muungano wa Tanzania Mhe. Dkt. Jakaya Kikwete mara baada ya kuwasili katika uwanja wa ndege wa kimataifa wa Julius Nyerere mwezi Julai, 2013.



Waziri wa Nchi, Ofisi ya Makamu wa Rais - Muungano Mhe. Samia Suluhu Hassan akifafanua jambo wakati alipotembelea mradi wa kilimo cha Mpunga na umwagiliaji kwenye bonde la mpunga la Jendele wakati wa ziara yake Zanzibar Aprili, 2013.



Rais wa Jamhuri ya Muungano wa Tanzania, Mhe. Dkt. Jakaya Mrisho Kikwete akiwa kwenye mazungumzo na Rais wa Shirika la Ushirikiano na Misaada ya Kimataifa la Japan (JICA) Dkt. Akihiko Tanaka kwenye Hoteli ya Intercontinental Yokohama, Japan Juni, 2013.



Mhe. Dkt. Jakaya Mrisho Kikwete, Rais wa Jamhuri ya Muungano wa Tanzania, Makamu wa pili wa Rais wa Zanzibar Mhe. Balozi Seif Ali Iddi (kulia) na Afisa mwandamizi kutoka katika kitengo cha elimu katika ofisi ya Benki ya Dunia nchini, Bwana Nobuyuki Tanaka wakikata utepe wakati wa hafla ya ufunguzi wa Shule ya Sekondari ya Mlimani Matemwe huko Zanzibar mwaka 2013. Shule hiyo imejengwa kwa ushirikiano kati ya Serikali ya Mapinduzi Zanzibar na Benki ya Dunia.



Waziri wa Nchi, Ofisi ya Makamu wa Rais - Muungano Mhe. Samia Suluhu Hassan akiwa katika picha ya pamoja na wanafunzi wa Vyuo vya Elimu ya Juu Zanzibar wakati wa kongamano la kutoa elimu ya Muungano kwa vijana wa Vyuo vya Elimu ya Juu Januari, 2014.



Waziri wa Nchi, Ofisi ya Makamu wa Rais - Muungano Mhe. Samia Suluhu Hassan akifafanua kuhusu masuala ya Muungano katika kongamano lililohusisha vyuo vya Elimu ya Juu Mbeya mwaka 2014. Kulia ni Naibu Katibu Mkuu Ofisi ya Makamu wa Rais, Eng. Anjelina Madete na kushoto ni Prof. Romuald Haule.



Mhe. Dkt. Ali Mohamed Shein, Rais wa Zanzibar na Mwenyekiti wa Baraza la Mapinduzi akibonyeza kitufe kuashiria uzinduzi wa Sherehe za Miaka 50 ya Muungano wa Tanganyika na Zanzibar, katika ukumbi wa Salama Bwawani Zanzibar, kushoto ni Makamu wa Kwanza wa Rais wa Zanzibar Maalim Seif Sharrif Hamad, akifuatiwa na Waziri wa Nchi, Ofisi ya Makamu wa Rais - Muungano Mhe. Samia Suluhu Hassan na Mhe. William Lukuvi, Waziri wa nchi, Ofisi ya Waziri Mkuu-Sera na Uratibu wa Bunge wakishuhudia uzinduzi huo mwaka 2014.



Nembo ya kuadhimisha Miaka 50 ya Muungano wa Tanganyika na Zanzibar iliozinduliwa na Rais wa Zanzibar na Mwenyekiti wa Baraza la Mapinduzi Mhe. Dkt. Ali Mohamed Shein tarehe 1 Machi, 2014.






Mhe. Samwel Sitta akila kiapo kuwa Mwenyekiti wa Bunge Maalum la Katiba mbele ya Katibu wa Bunge Maalum la Katiba Bw. Yahya Khamis Hamad, Mjini Dodoma. Kulia ni Naibu Katibu wa Bunge hilo Thomas Kashilila, mwaka 2014.



Mhe. Samia Suluhu Hassan akila kiapo kuwa Makamu Mwenyekiti wa Bunge Maalum la katiba mbele ya Naibu Katibu wa Bunge maalum la Katiba Thomas Kashilila kuwa Mjini Dodoma. Kulia ni Katibu wa Bunge hilo Yahya Khamis Hamad mwaka 2014.



Mhe. Dkt. Jakaya Kikwete, Rais wa Jamhuri ya Muungano wa Tanzania akihutubia Bunge Maalum la Katiba mjini Dodoma mwezi Machi, 2014.



Sehemu ya Wajumbe wa Bunge Maalum la Katiba wakimsikiliza Rais wa Jamhuri ya Muungano wa Tanzania, Mhe. Dkt. Jakaya Mrisho Kikwete alipohutubia Bunge hilo mwezi Machi, 2014.


### 5.3 Baadhi ya majengo ya Taasisi za Muungano



Jengo la Ofisi ya Makamu wa Rais lililopo katika mtaa wa Luthuli, Dar es Salaam.



Jengo la Ofisi ya Makamu wa Rais wa Jamhuri ya Muungano wa Tanzania lililopo Tunguu, Zanzibar.



Jengo la Ukumbi wa Bunge la Jamhuri ya Muungano wa Tanzania lililopo Dodoma.



Jengo la Benki Kuu ya Tanzania lililopo Dar es Salaam.



Ikulu ndogo iliyopo Wete Pemba.



Jengo la Uhamiaji Makao Makuu lililopo Zanzibar.







Ofisi ya Makamu wa Rais,  
S.L.P. 5380, Dar es Salaam, Tanzania. Simu: +255 22 2113857 / 2116995,  
Nukushi: +255 22 2113856  
Tovuti: [www.vpo.go.tz](http://www.vpo.go.tz)